

JEDNOGLASNO USVOJEN BUDŽET DISTRIKTA ZA 2024. GODINU

Informativni Bilten Skupštine Brčko distrikta BiH - godina 2023 - oktobar, novembar, decembar - broj 5



**SRĐAN BLAŽIĆ, predsjedavajući Komisije
za budžet: „U BUDŽETU ZA 2024. GODINU
OBEZBIJEĐENA SREDSTVA ZA JEDNOKRATNU
NOVČANU POMOĆ MATURANTIMA“**



SKUPŠTINA BRČKO DISTRIKTA BiH

Bilten

broj 5. za 2023. godinu



**DAMIR BULČEVIĆ, predsjedavajući Komisije za mlade:
“MLADI KROZ OMLADINSKE ORGANIZACIJE MOGU MNOGO
DOPRINIJETI RAZVOJU DRUŠTVA“**



RAZGOVOR SA STRUČNIM SARADNICIMA ZA SKUPŠTINSKE KOMISIJE
KATICOM IVANOVIĆ I AMROM HALKIĆ



SADRŽAJ

UVOD	5
JEDNOGLASNO USVOJEN BUDŽET DISTRIKTA ZA 2024. GODINU	6
INTERVJU: SRĐAN BLAŽIĆ, PREDSEDAVAJUĆI KOMISIJE ZA BUDŽET	8
ODOBRENO DODATNO KREDITNO ZADUŽENJE ZA PROJEKAT „VODOSNABDIJEVANJE BRČKO“	11
ELEKTRIČNA ENERGIJA ĆE SE I U 2024. GODINI NABAVLJATI PO POVOLJNIM CIJENAMA	12
ŠEST INFRASTRUKTURNIH PROJEKTA UVRŠTENI NA LISTU PROJEKATA JAVNO-PRIVATNOG PARTNERSTVA	13
ODOBREN TRANSFER ZA POSEBNE NAMJENE U IZNOSU OD 150 000 KM	13
ZAVOD ZA ZAPOSŁJAVANJE I KOMISIJA ZA HARTIJE OD VRIJEDNOSTI DOBILI POZITIVNO REVIZORSKO MIŠLJENJE.....	14
RADIT ĆE SE NOVI ZAKON O DJEČIJOJ ZAŠTITI	15
RADOVI NA REKONSTRUKCIJI MOSTA BRČKO – GUNJA POČINJU SLJEDEĆE GODINE	16
INTERVJU: DAMIR BULČEVIĆ, PREDSEDAVAJUĆI KOMISIJE ZA MLADE	18
SKUPŠTINA PODRŽALA KAMPANJU „16 DANA AKTIVIZMA“	20
ODRŽAN OKRUGLI STO NA TEMU „INSTITUCIONALNI OKVIR ZA RAVNOPRAVNOST SPOLOVA NA NIVOU BRČKO DISTRIKTA BIH“	22
ODRŽANO PREDAVANJE O UNAPREĐENJU SIGURNOSTI DJECE I MLADIH NA INTERNETU	24
RAZGOVOR SA STRUČNIM SARADNICIMA ZA SKUPŠTINSKE KOMISIJE KATICOM IVANOVIĆ I AMROM HALKIĆ	25
SUSRETI IZVIĐAČA ODRŽANI U BRČKOM NAKON 32 GODINE	29
ODRŽANI 40. INTERNACIONALNI TEATARSKI SUSRETI.....	30
NAŠ GRAD BIO DOMAĆIN EVROPSKOG PRVENSTVA U KUGLANJU	31
PREDSEDNIK SKUPŠTINE PODIJELIO NOVOGODIŠNJE DAROVE NAJMLAĐIM SUGRAĐANIMA	34
ČESTITKA PREDSEDNIKA I POTPREDSJEDNIKA SKUPŠTINE POVODOM NOVE GODINE	36

IMPRESUM

Stručna služba Skupštine Brčko distrikta BiH

Uređivački tim Biltena:

Urednica:

Maja Kovačević-Gudelj, stručni savjetnik za odnose s javnošću

Tehnička obrada i grafički dizajn:

Mato Radić, tehničar za rukovanje audio i video tehnikom

Prilagodio za web:

Stefan Marjanović, administrator IT sistema

Lektori:

Andrea Antić-Dugeč

Marica Lakić

Fatima Ribić

Fotografije i tekst

Arhiva Stručne službe Skupštine

UVOD



Posljednje tromjesečje 2023. godini obilježila su redovna i vanredna zasjedanja te donošenje najvažnijeg finansijskog dokumenta za Distrikt, a to je budžet za 2024. godinu. Budžet je usvojen jednoglasno na 17. vanrednoj sjednici koja je održana krajem decembra, što je bilo u skladu sa zakonskim rokovima za usvajanje ovog dokumenta.

Skupština se pridružila kampanji „16 dana aktivizma“, koju je OSCE, u saradnji s Omladinskim centrom Vermont, realizovao nizom aktivnosti. Održan je i okrugli sto posvećen borbi protiv rodno zasnovanog nasilja.

Naš grad je nakon 32 godine ponovo bio domaćim međunarodnog susreta izviđača kojem je prisustvovao i predsjednik Skupštine Distrikta zajedno s gradonačelnikom.

Za kraj godine Skupština je obezbijedila novogodišnje paketiće za najmlađe sugrađane koji idu u vrtiće Javne ustanove „Naša djeca“.

I u ovom broju predstavili smo zaposlene u Stručnoj službi kao i rad dvije skupštinske komisije

s poštovanjem

Urednik Biltena
Maja Kovačević Gudelj

JEDNOGLASNO USVOJEN BUDŽET DISTRIKTA ZA 2024. GODINU



Skupština Brčko distrikta BiH je na 17. vanrednom zasjedanju jednoglasno usvojila budžet Distrikta za 2024. godinu u iznosu od 399,4 miliona KM. Budžet je usvojen uz trideset osam (38) amandmana Komisije za budžet, dok su odbijena sva šezdeset četiri (64) amandmana koje je predložila opozicija. Predsjednik Skupštine Siniša Milić rekao je da je jednoglasno usvajanje budžeta pozitivna poruka i dobar primjer kako ova zajednica može da napreduje i da se razvija uz razumijevanje sadržaja dokumenata.

„Budžet sadrži mnogo dobrih stvari zbog kojih ga je i vrijedilo podržati. Veliki dio novca je izdvojen za kapitalni budžet i to je ono na čemu treba raditi. Ne treba biti pretjerano euforičan nakon svega ovoga. Ulazimo u izbornu godinu. Sigurno je da će biti određenih političkih turbulencija, ali mislim da je na nama svima da ono što je predviđeno u budžetu bude i realizovano u interesu građana“, rekao je Milić novinarima nakon završetka vanredne sjednice.

Predsjedavajući skupštinske Komisije za budžet Srđan Blažić rekao je da je došlo do povećanja

iznosa budžeta sa 398,9 miliona KM na 399,4 miliona KM zbog donacija koje su stigle Distriktu po različitim osnovama od međunarodnih organizacija.

Blažić je istakao da je više od 121 miliona KM izdvojeno za kapitalne projekte, da je 108 miliona maraka namijenjeno za bruto plate i naknade, 80 miliona KM izdvojeno je za subvencije, transfere i druga davanja, dok je za podsticaje u poljoprivredi obezbijeđeno 12 miliona KM.

„Izdvojili smo dodatni novac za naknadu štete poljoprivrednicima nastale usljed gubitka stočnog

fonda zbog afričke kuge svinja kao i sredstva za obnovu proizvodnje u svinjogojstvu i programe samozapošljavanja u privredi", rekao je Blažić.

On je dodao da je prvi put u budžetu predviđen novac za jednokratnu novčanu pomoć od po 300 KM svakom maturantu uz uslov da volontiraju za svoj grad dan ili dva.

Gradonačelnik Brčkog Zijad Nišić rekao je da će Distrikt sljedeće godine imati na raspolaganju još 20 miliona KM grant sredstava i da će to biti najveći iznos sredstava koji je stigao u Distrikt od njegovog formiranja.

Usvojena je odluka da visina stope poreza na nekretnine u Brčko distriktu za 2024. godinu bude ista

kao i do sada, odnosno 0,05 posto. Po hitnom postupku usvojeni su: Zakon o izvršenju budžeta Distrikta za 2024. godinu, Izmjena Zakona o platama i naknadama u organima javne uprave i institucijama Brčko distrikta i Izmjene i dopune Zakona o hartijama od vrijednosti.

Data je saglasnost na revidirani plan JP „Luka Brčko“ za 2023. godinu.



Intervju

SRĐAN BLAŽIĆ

predsjedavajući Komisije za budžet



SRĐAN BLAŽIĆ, predsjedavajući Komisije za budžet

Komisija za budžet Skupštine Brčko distrikta BiH zadužena za izvještavanje o osnovnosti prijedloga budžeta od gradonačelnika. Također, razmatra predloženi budžet prije nego što dođe Skupštini na razmatranje te daje preporuke Skupštini za usvajanje budžeta ili predlaže neophodne izmjene.

Komisija je dužna da obezbijedi usvajanje budžeta u skladu sa zakonom, Statutom Distrikta i Poslovníkom o radu Skupštine. Obav-

lja i druge aktivnosti određene Poslovníkom i odlukama Skupštine. O aktivnostima Komisije razgovarali smo sa predsjedavajućim ovom komisijom Srđanom Blažićem i osvrnuli se na usvojeni budžet za 2024. godinu, rebalans budžeta za 2023. godinu kao i na nekoliko inicijativa koje su od strane predsjedavajućeg Blažića upućene Skupštini.

*Razgovarala:
Maja Kovačević-Gudelj*

Gospodine Blažiću, Prijedlog budžeta za 2024. godinu na vrijeme je ušao u skupštinsku proceduru i na vrijeme je usvojen, a o njemu su održane dvije javne rasprave. Kakvi su bili zahtjevi građana?

„Gornja granica prihoda je planirana u iznosu od 398,9 miliona KM. Od toga 92 miliona KM je kapitalni budžet koji je prenesen iz ranijih godina kako je to naložio izmijenjeni Zakon o budžetu.

Mogu reći da je odziv građana na javnim raspravama bio veoma dobar. Stiglo je mnogo prijedloga i zahtjeva od strane građana i mjesnih zajednica, prije svega, u dijelu putne, vodovodne, kanalizacione infrastrukture i elektromreže. Mi se moramo ponašati u skladu s izmjenama i dopunama Zakona o budžetu i tako smo mi u Komisiji i postupili.

Podsjetit ću da je Zakon ranije propisao da kada Vlada utvrdi gornju granicu prihoda, nije je moguće mijenjati, ali je moguće vršiti preraspodjelu sredstava unutar budžeta i tako napraviti uštede kako bi one bile preusmjerene. To smo morali uraditi zbog primjene Pravilnika o naknadama troškova za prevoz i to je ukalkulisano u Budžet za 2024. godinu.

Kroz ovaj budžet bit će realizovan i dogovor sa sindikatima o povećanju plata za pet posto. Za podsticaje u poljoprivredi ponovo je obezbijeđeno 15 000 000 KM, za socijalna davanja obezbijeđeno je blizu 30 000 000 KM, kao i sredstva za transfere prema javnim ustanovama, zavodima i fondovima.

Prvi put u budžetu je previđen novac za jednokratnu novčanu pomoć od po 300 KM svakom maturantu uz uslov da volontiraju za svoj grad dan ili dva.“

Primjetan je rast budžeta iz godine u godinu, a iznos budžeta za 2024. godinu je značajno veći u odnosu na sve dosadašnje budžete. Kako to komentarišete?

„Budžet posljednjih godina raste. Tome je doprinio rast prihoda kroz indirektno poreze. Određeni prihodi od direktnih poreza su pali. Povećali smo neoporezivi dio plate sa 500 KM na 1200 KM što se odrazilo u ukupnoj sumi prihoda

na dobit pojedinca i tu su pali direktni prihodi. Prihodi od dobiti preduzeća rastu i oni su za prošlu godinu bili 17,5 miliona KM što nam govori da privreda ostvaruje dobre rezultate.

Budžet za 2024. godinu jeste veliki ali i davanje su također velika.“

Šta bi po Vašem mišljenju trebalo uvrstiti u budžet, a što do sada nije bilo?

„Mnogo toga. Treba, prije svega, razmisliti o davanjima. Povećali smo plate zaposlenim u javnom sektoru. Treba prepoznati i potrebe stanovnika Distrikta koji su nezaposleni, mladi, penzioneri. Već imamo u planu određene projekte.“

Podsjetit ćemo se i rebalansa budžeta za 2023. godinu koji je usvojen u iznosu od oko 40 000 000 KM. Kako su sredstva raspoređena?

„To je jedini rebalans budžeta za 2023. godinu. Radi se o jednom kvalitetnom dokumentu. Trebalo je duže vremena da uđe u skupštinsku proceduru. Dva mjeseca skupštinske rasprave doprinijelo je tome da obuhvatimo

sve one potrebe i zahtjeve koje smo dobili od odjeljenja Vlade i institucija Brčko distrikta kao i one zahtjeve koji su nam dostavljeni tokom javne rasprave od strane pojedinaca, udruženja građana i mjesnih zajednica.

Vrlo važne stavke u ovom rebalansu budžeta jesu subvencije domaćinstvima za troškove električne energije i za te namjene je izdvojeno 3,8 miliona KM. Subvencije će se dijeliti kroz dva programa koje će raditi nadležno odjeljenje Vlade Brčko distrikta zajedno s drugim institucijama i JP „Komunalno Brčko“. Rebalansom su obezbijeđena i sredstva za sanaciju štete poljoprivrednicima uzrokovanoj afričkom kugom svinja.

Niz je i kapitalnih projekata koji su se našli u ovom rebalansu budžeta. Imali smo mnogo više zahtjeva od strane privrednika za podsticaje u privredi i za te namjene rebalansom je izdvojeno 4 000 000 KM.

Meni je posebno drag program koji provodi Razvojno-garantni fond, a to je subvencija kamate za kupovinu prve nekretnine za koju smo izdvojili 100 000 KM.

Imali smo izmjenu Zakona o dječijoj zaštiti gdje smo ponovo vratili prava na dječiji doplatka porodicama koje su gubile to prava



vo zbog nesrazmjernosti između minimalne plate u entitetima i prosječne u Distriktu. Sve je to ukalkulisano u ovaj rebalans.“

Kako je obezbijeđen novac za rebalans i kako ga ocjenjujete u odnosu na rebalanse iz prethodnih godina?

„Mogu reći da je u poređenju s prethodnim godinama, ovo najkvalitetniji rebalans do sada. Imali smo viška prihoda nad rashodima. Prihodovna strana je bila dosta dobra i mogli smo da pokrijemo mnogo tih zahtjeva i prijedloga i čini mi se da smo dobili kvalitetan dokument. Sada je na odjeljenjima Vlade i institucijama da idu ka realizaciji svega toga.“

Ove godine Skupština je usvojila izmjene Zakona o budžetu? Na šta se odnose te izmjene?

„Prijedlog budžeta za 2024. godinu je usvojen po novim pravilima koje su donijele izmjene i dopune Zakona o budžetu koje su usvojene ljetos. Te izmjene i dopune odnose se na kapitalni budžet odnosno na njegovo planiranje i realizaciju. Projekti koji imaju projektno-tehničku dokumentaciju ili su blizu dobijanja građevinske dozvole se planiraju u iznosu koji je potreban za njihovu realizaciju dok projekti koji nemaju projektno-tehničku dokumentaciju ni dozvolu mogu se planirati samo u iznosu koji je dovoljan da se uradi taj administrativni dio.

Čini mi se da će ovaj budžet donijeti nova ponašanja prije svega javne uprave Brčko distrikta u smislu realizacije kapitalnog budžeta, boljeg planiranja projekata u kapitalnom budžetu i ako se bude nastavilo ovim radom vjerujem da ćemo već sljedeće godine osjetiti

efekte Izmjena i dopuna Zakona o budžetu Brčko distrikta u smislu da će mnogo bolje i brže ići realizacija kapitalnih projekata.“


Inicijator ste uvođena projekta e-beba, odnosno sistema koji bi omogućio porodiljama da odmah u porodilištu prijave svoju bebu. To još nije zaživjelo. Zašto?

„Inicijativu za ovaj projekat pokrenuo sam prije dvije godine. Nažalost, vladina odjeljenja odnosno Odjeljenje za javni registar nije prepoznalo kvalitet i po tom pitanju nisu ništa uradili. Obratili smo im se sa zahtjevom da urade analizu i utvrde šta je sve potrebno da ovaj projekat zaživi i da se na osnovu toga planiraju budžetska sredstva i donesu određeni podzakonski akti. Do danas nema odgovora iz Odjeljenja za javni registar. U ovom trenutku, mislim da imamo sve

resurse da pokrenemo projekat e-beba što bi bilo od velike pomoći porodiljama. Tražit ćemo ponovo informaciju od Odjeljenja.“

Za razliku od ove, inicijativa za besplatan parking trudnicama i porodiljama je zaživjela. Jeste li zadovoljni njenom realizacijom?

„Ovu inicijativu sam pokrenuo zajedno s kolegom Abdulahom Iljazovićem. Upućena je Javnom preduzeću „Putevi Brčko“ i ovom prilikom zahvalio bih se direktoru na realizaciji inicijative. Aktivnost je pokrenuta. Napravljen je modalitet po kojem će svaka trudnica i porodilja dobiti nekoliko desetina besplatnih karti na časovnom nivou. Na nekoliko mjesta obilježena su parking mjesta za trudnice i porodilje. Drago mi je što je ova inicijativa zaživjela, a siguran sam da će ih biti još.“



ODOBRENO DODATNO KREDITNO

ZADUŽENJE ZA PROJEKAT

„VODOSNABDIJEVANJE BRČKO“

Skupština Brčko distrikta BiH je na 52. redovnoj sjednici usvojila Odluku o dodatnom kreditnom zaduženju Distrikta kod Evropske banke za obnovu i razvoj za realizaciju projekta „Vodosnabdijevanje Brčko“. Dodatno kreditno zaduženje je isto kao i prvobitno i iznosi 6 500 000 eura.

Predsjednik Skupštine Siniša Milić rekao je da je Skupština ovu odluku podržala većinom glasova uz zaključak kojim se zadužuje vladino Odjeljenje za komunalne poslove da Skupštini dostavi svu neophod-

nu dokumentaciju i informaciju o tome kako je došlo do promjene projekta, a naročito u pogledu promjene cijevi koje se ugrađuju jer je tu, napominje, bilo najviše primjedbi i sumnji poslanika.

Predsjednik Milić je dodao i da je Odjeljenje obavezano da izvještava Skupštinu o realizaciji ovog projekta svaka tri mjeseca.

„Poslanici su tražili da im se obrate i predstavnici Evropske banke za obnovu i razvoj i konsultant kako bi im dali dodatna pojašnjenja. Informisani smo o tome da je projektni

zadatak došao od strane Brčko distrikta i promjena tih materijala je bila na zahtjev Brčko distrikta. Upravo iz tih razloga smo tražili dodatne informacije kroz zaključak kako bi se informisali o razlozima koji su doveli do poskupljenja ovog projekta“, istakao je predsjednik.

On je podsjetio da se projekat odnosi na izgradnju glavnog transportnog cjevovoda trasom obilaznice od fabrike vode u naselju Plazulje do naselja Potočari te da će se na taj način riješiti problem vodosnabdijevanja većeg dijela Distrikta.



ELEKTRIČNA ENERGIJA ĆE SE 2024. GODINI NABAVLJATI PO POVOLJNIM CIJENAMA

Informišući Skupštinu o preuzetim i realizovanim aktivnostima vezanim za snabdijevanje Brčko distrikta električnom energijom za 2024. godinu, direktor JP „Komunalno Brčko“ Kemal Atić rekao je da je to preduzeće potpisalo ugovor s Mješovitim holdingom „Elektroprivreda Republike Srp-

ske“ koji će Distrikt snabdijevati električnom energijom u 2024. godini. Atić je napomenuo da se cijena električne energije za domaćinstva neće mijenjati.

„Električnu energiju nabavljamo po istoj cijeni kao i za 2023. godinu. Međutim, Državna regulatorna agencija je promijenila pro-

pis i povećala iznos balansiranja koji ona određuje. Tako da na kraju nabavna cijena električne energije je veća za 0,05 posto ili 150 000 KM do 200 000 KM, u zavisnosti od povlačenja za cijelu godinu. Ali, građanima cijena električne energije ostaje nepromijenjena“, rekao je Atić.



ŠEST INFRASTRUKTURNIH PROJEKTA UVRŠTENI NA LISTU PROJEKATA JAVNO-PRIVATNOG PARTNERSTVA

Skupština je odobrila odluku da se šest infrastrukturnih projekata uvrsti na listu projekata javno-privatnog partnerstva. Predsjednik Milić rekao je da je riječ o projektima koje je predložila Komisija za javno-privatno partnerstvo Vlade Brčko distrikta i da se radi o novom pristupu koji će omogućiti brži i kvalitetniji razvoj Distrikta, naročito kada su u pitanju infrastrukturni projekti, izgradnja objekata i pružanje usluga za



koje postoji potreba od strane građana.

„Imamo iskustvo kada je u pitanju ova vrsta projekata. Zahvaljujući javno-privatnom partnerstvu danas imamo digitalni centar „Fizenijus“ koji veoma uspješno funkcioniše već dugi niz godina“, napomenuo je predsjednik Milić.

ODOBREN TRANSFER ZA POSEBNE NAMJENE U IZNOSU OD 150 000 KM

Skupština Brčko distrikta BiH je na 16. vanrednoj sjednici odobrila Odluku o odobravanju transfera za posebne namjene kojom će se, putem javnog poziva, susjednim opštinama dodijeliti 150 000 KM za realizaciju određenih kapitalnih projekata.

„Radi se o transferima za posebne namjene u opštinama, a ne udruženjima građana kao što je pokušano da se insinuiraju. Ovo je standardna procedura koja je bila i u ranijim budžetima Distrikta. Napominjem da smo mi u ranijem periodu pomagali, u skladu s našim mogućnostima, potrebe susjednih opština“, istakao je predsjednik Skupštine Siniša Milić.



ZAVOD ZA ZAPOŠLJAVANJE I KOMISIJA ZA HARTIJE OD VRIJEDNOSTI DOBILI POZITIVNO REVIZORSKO MIŠLJENJE



Glavna revizorka Kancelarije za reviziju javne uprave i institucija u Brčko distriktu Selma Šadić rekla je da je revizorskom izvještaju Komisije za hartije od vrijednosti dato pozitivno mišljenje koje je dobio i Zavod za zapošljavanje Distrikta za finansijski dio Izvještaja, dok su mišljenja s rezervom dobili Odjeljenje za javni registar, Odjeljenje za poljoprivredu, šumarstvo i vodoprivredu, Odjeljenje za zdravstvo i ostale usluge i Odjeljenje za raseljena lica, izbjeglice i stambena pitanja Vlade Brčko distrikta. „Što se tiče Zavoda za zapošlja-

vanje, na dio Izvještaja koji se odnosi na usklađenost poslovanja sa zakonima i drugim propisima dato je mišljenje s rezervom i šesnaest (16) preporuka. Pozitivno mišljenje revizora sa skretanjem pažnje dobio je i finansijski izvještaj Javne zdravstvene ustanove „Zdravstveni centar Brčko“, dok je revizorski izvještaj ove ustanove za usklađenost poslovanja sa zakonima i propisima dobio mišljenje s rezervom“, dodala je Šadićeva. Šadićeva je istakla da su mišljenja s rezervom dobili i revizorski izvještaji za finansijske izvještaje i usklađenost poslovanja sa zakon-

ima i propisima Razvojno-garantnog fonda, JP „Komunalno Brčko“ kao i finansijski izvještaji Odjeljenja za evropske integracije i međunarodnu saradnju, Odjeljenja za komunalne poslove i JP „Luka Brčko“, dok su ova tri subjekta za usklađenost poslovanja sa zakonima i propisima dobila pozitivno mišljenje sa skretanjem pažnje. Ona je napomenula da je Kancelarija za reviziju dostavila sve revizorske izvještaje za 2022. godinu revidiranim subjektima, Vladi i Skupštini Distrikta i da je data ukupno 671 preporuka, ali da je nizak procent realizacije tih preporuka.

RADIT ĆE SE NOVI ZAKON O DJEČJOJ ZAŠTITI

Skupština Brčko distrikta BiH u nastavku 52. redovne sjednice nije usvojila Nacrt zakona o dopuni Zakona o dječjoj zaštiti u prvom čitanju.

Iz Vlade Distrikta izjasnili su se da imaju određene primjedbe na prijedlog dopuna ovog zakona te da će Vladino Odjeljenje za zdravstvo

i ostale usluge izraditi novi prijedlog zakona koji će, između ostalog, regulisati i visinu naknade za roditelje i staratelje koji imaju djecu sa stopostotnim invaliditetom.

Predsjednik Skupštine Siniša Milić rekao je da će se u naredna tri, četiri mjeseca dobiti Nacrt zakona o izmjenama Zakona o dječjoj zašti-

ti koji će sadržavati odredbe koje se tiču kategorije lica o kojima je bilo riječi u prijedlogu zakona koji je predložila opozicija uz jednu sveobuhvatnu analizu koja će omogućiti da oni na koje se Zakon odnosi budu u prilici da ostvare svoja prava.



RADOVI NA REKONSTRUKCIJI

MOSTA BRČKO-GUNJA

POČINJU SLJEDEĆE GODINE



Predsjednik Skupštine Brčko distrikta Siniša Milić rekao je da će, prema informacijama koje su stigle iz Vijeća ministara BiH, građevinski radovi na rekonstrukciji mosta Brčko-Gunja početi sljedeće godine.

„Uvjereni smo da će se stvari odvijati određenom dinamikom. Mislim da smo uspostavili dobru komunikaciju sa Hrvatskom. Ono što je također važno za nas to je da što prije dobijemo prostorno-plansku dokumentaciju kojom će biti definisan i položaj novog mosta kako bi problem odvijanja saobraćaja na ovom graničnom prelazu bio riješen prema standardima“, rekao je Milić na konferenciji za novinare.

Milić je istakao da je ratifikacija sporazuma između BiH i Hrvatske u vezi sa rekonstrukcijom graničnog mosta Brčko-Gunja preko rijeke Save dokaz da se sinergijom onih koji su uključeni u ovaj proces može doći do rješenja koje je u interesu Brčko distrikta.

Dodao je da se granični prelaz koji se trenutno koristi nalazi u centru grada i da to nije adekvatno rješenje te da očekuje da će se taj problem riješiti izgradnjom novog mosta.

„Očekujem da ćemo to raditi u sinergiji svih onih koji su zainteresovani za rješavanje problema“, istakao je Milić.

Koordinator Brčko distrikta pri Vijeću ministara BiH Miroslav Gavrić rekao je da su posljednjih sedam mjeseci intenzivirane aktivnosti na rekonstrukciji mosta i da je rekonstrukcija samo privremeno rješenje za teretna vozila dok se ne izgradi novi most za čiju gradnju se traže sredstva od EU.

„Javno preduzeće Putevi Brčko će uzeti svoje učešće u onom dijelu koji se odnosi na pristupne puteve, a što se tiče rekonstrukcije samog mosta ona se nije mogla ni početi bez opšteg sporazuma između Hrvatske i BiH kojim je definisan način rekonstrukcije i ostalih radova vezanih za to“, rekao je Gavrić. On je dodao da Distrikt svake go-



dine od Vijeća ministara dobija grant od 70 000 KM za tekuće održavanje mosta i da taj novac ide Javnom preduzeću „Putevi Brčko“, ali da se ta sredstva sada ne koriste jer se čeka rekonstrukcija mosta.

Gradonačelnik Brčkog Zijad Nišić rekao je da za ove poslove Distrikt nema budžetskih implikacija već samo zadatak da obezbijedi pristupni put za most.

Nišić je podsjetio da su se BiH i Hrvatska potpisivanjem sporazuma od 12. oktobra obavezale da zajednički finansiraju rekonstrukciju mosta.

„Po nekim okvirnim procjenama on bi iznosio oko 10 miliona KM. Hrvatska bi uložila oko pet miliona, isto toliko i BiH“, rekao je Nišić.

Nišić je istakao da su zbog obustave saobraćaja za teretna vozila preko graničnog mosta Brčko-Gunja nanesene štete privredi, poljoprivredi i turizmu Brčko distrikta. Saobraćaj za teretna vozila i autobuse preko graničnog mosta Brčko-Gunja potpuno je obustavljen 24. januara 2019. godine zbog teških oštećenja.

Predstavnički dom Parlamentarne skupštine BiH je na 12. sjednici

dao saglasnost na ratifikaciju sporazuma između Vijeća ministara BiH i Vlade Hrvatske o rekonstrukciji graničnog mosta Brčko-Gunja preko rijeke Save.

Tim povodom gradonačelnik Brčkog Zijad Nišić održao je konferenciju za medije kojoj su prisustvovali i predsjednik Skupštine Brčko distrikta Siniša Milić, koordinator Brčko distrikta pri Vijeću ministara BiH Miroslav Gavrić, zamjenik gradonačelnika Brčko distrikta Anto Domic i koordinator Vlade Distrikta Željko Antić. Nakon konferencije za medije obišli su most.

DAMIR BULČEVIĆ

predsjedavajući Komisije za mlade



DAMIR BULČEVIĆ, predsjedavajući Komisije za mlade

Komisija za mlade Skupštine Brčko distrikta BiH razmatra pitanja u vezi s planiranjem i sprovođenjem omladinske politike i zaštite prava i interesa mladih kao i položaj mladih u društvu; Komisija radi i na promociji prava i interesa mladih te obavlja i druge poslove određene Poslovníkom i odlukama Skupštine.

Komisija ima pet članova, a predsjedavajući je Damir Bulčević s kojim smo razgovarali o temama koje se tiču mladih u Distriktu ali i o aktivnostima Komisije.

*Razgovarala:
Maja Kovačević-Gudelj*

Kako ocjenjujete položaj mladih u našoj lokalnoj zajednici?

„Mladi ljudi odlaze iz Bosne i Hercegovine, pa tako i iz Brčko distrikta BiH, svi demografski trendovi su zabrinjavajući u cijeloj zemlji, jer nam odlaze fertilno i radno sposobne generacije. To je jedan od gorućih problema u cijeloj zemlji. Mladi ljudi odlaze iz Bosne i Hercegovine radi loših političara koji godinama unazad nisu bili spremni da naprave takvo društvo u kojem će mlad čovjek poželjeti da živi, da ima posao na osnovu svojih kompetencija,

školovanja itd. Mladi ljudi u Brčko distriktu BiH nisu u povoljnom položaju i bez obzira na benefite koje kao Distrikt imamo mislim da nismo dovoljno učinili da popravimo stanje u kojem se sada nalaze.“

Donesena je Strategija za mlade. Koliko će ona pomoći da položaj mladih bude bolji?

„Strategija za mlade Brčko distrikta BiH je bitna, to je osnov odakle treba krenuti, bolje bi bilo da je ranije donesena, ali bolje ikad nego nikad. Kroz nju je predviđeno dosta mjera, od kojih bi posebno istakao u organizacionom smislu

formiranje Odsjeka za mlade pri resornom Odjeljenju u Vladi Brčko distrikta BiH. Nakon Strategije bitno je usvojiti i akcioni plan kroz koji ćemo jasno definisati dalju razradu iste ali i period u kojem koja mjera treba biti urađena s nosiocima aktivnosti.“

Koliko se poštuje Zakon o mladima i da podsjetimo na osnovna pitanja koje definiše?

„Zakon propisuje prava i obaveze mladih, njihovo organizovanje, udruživanje, briga za mlade, institucionalno uključivanje u odluke mladih i druga pitanja vezana za mlade. U zakonu stoji da se Strategija za mlade donosi na period od pet godina, a mi smo usvojili Strategiju za mlade 2022.-2026. godina. Vlada također ima obaveznu da odvoji finansijska sredstva po istoj. Nadzor nad Zakonom vrši resorno Odjeljenje, a propisane su i kazne za one koji se ne pridržavaju ovog zakonskog rješenja.“

Prema Vašem mišljenju, šta je potrebno uraditi da mladi budu više uključeni u proces donošenja odluka? Jesu li mladi uopšte zainteresovani za to?

„Dobro pitanje, ja mislim da od samih mladih ljudi moraju krenuti inicijative za onim što oni žele. Imaju dobar zakonski okvir, vjerujem da svi donosioci odluka u Brčko distriktu BiH nikad neće odbiti da pomognu mladim ljudima da imaju što ljepšu i sigurniju budućnost. Žao mi je, što po nekim istraživanjima na nivou BiH, veoma mali broj mladih ljudi želi da se bave politikom. Smatram da što veći broj mladih, kvalitetnih ljudi kroz omladinske organizacije

može mnogo doprinijeti razvoju društva.“

Kako ocjenjujete rad Vijeća mladih Brčko distrikta BiH? Jesti li zadovoljni? Kakva je međusobna saradnja Vijeća i Komisije za mlade? Postoje li možda zajednički plan rada ili projekti na kojima se radi ili ćete raditi, prije svega, u cilju promocije prava i interesa mladih?

„Moram biti iskren, Komisija za mlade na čijem čelu sam proteklih sedam mjeseci aktivno saraduje s Vijećem mladih Brčko distrikta BiH, dostavili su nam izvještaj o radu koji po mišljenju Komisije može biti bolji. Vijeće mladih Brčko distrikta BiH treba biti reprezentativnije i treba imati mnogo više aktivnosti, naravno za to im Vlada Brčko treba osigurati podršku. Želim pohvaliti njihov dosadašnji trud i rad, ali ima dosta toga što se treba popraviti. Na žalost ni Komisija za mlade Brčko distrikta BiH nije bila aktivna, jer od 2020. do 2023. godine je imala samo

dvije sjednice. Vijeće, Komisija i resorno Odjeljenje Vlade Brčko distrikta BiH u narednom periodu moraju zasukati rukave.“

Možete li ocijeniti dosadašnji rad Komisije i šta imate u planu raditi u narednom periodu?

„Već u prethodnom pitanju sam rekao da Komisija za mlade, u protekle dvije i po godine skoro nikako nije radila. Komisija je osnovna ćelija parlamentarnog sistema i kao takva razmatra sva pitanja u vezi s planiranjem i provođenjem omladinske politike, zaštite prava i interesa mladih ljudi, položaja mladih ljudi, radi na promociji mladih i njihovih ostvarenja.“

Na koji način mladi mogu da se obrate Komisiji za bilo koja pitanja i pomoć?

„Putem emaila damir.bulcevic@skupstinabd.ba ili lično u prostorijama Skupštine Brčko distrikta BiH da zakažu sastanak.“



SKUPŠTINA PODRŽALA KAMPANJU „16 DANA AKTIVIZMA“

Skupština Brčko distrikta BiH podržala je kampanju „16 dana aktivizma“ koju je OSCE, u saradnji s Omladinskim centrom Vermont, realizovao nizom aktivnosti, a radi zaustavljanja rodno zasnovanog nasilja. Jedna od tih aktivnosti bila je i podjela promotivnog materijala poslanicima u Skupštini prije početka nastavka 52. redovnog

zasjedanja.

Moto ovogodišnje kampanje je: „Spriječi! Zaštiti! Radi za preživjele! Čini da prestane rodno zasnovano nasilje!“.

Kampanja je počela 25. novembra na Svjetski dan borbe protiv nasilja nad ženama i djevojčicama, i trajala je do 10. decembra, kada se obilježava Međunarodni dan ljudskih prava.





ODRŽAN OKRUGLI STO NA TEMU „INSTITUCIONALNI OKVIR ZA RAVNOPRAVNOST SPOLOVA NA RAZINI BRČKO DISTRIKTA BiH“



U okviru kampanje „16 dana aktivizma protiv rodno zasnovanog nasilja“ u Skupštini Brčko distrikta BiH je održan okrugli sto na temu: „Institucionalni okvir za ravnopravnost spolova na nivou Brčko distrikta BiH“ radi analize efikasnosti postojećih politika i institucionalnog okvira za ravnopravnost spolova u Distriktu i donošenja novih ili unapređivanja postojećih mehanizama za ravnopravnost spolova.

Organizatori okruglog stola bili su Komisija za zaštitu ljudskih prava i Komisija za ravnopravnost spolova Skupštine Brčko distrikta u saradnji s Misijom OSCE-a u BiH. Predsjedavajuća skupštinske Komisije za zaštitu ljudskih prava Milijana Simić rekla je da je neophodno urediti zakonski okvir i politike za rodnu ravnopravnost te da Distrikt ima Akcioni plan za rodnu ravnopravnost, koji još nije implementiran.

„Nikad neću biti zadovoljna položajem žena u društvu, posebno u politici i institucijama. Mislim da su žene zapostavljene na radnim mjestima i nisu jednako plaćene za iste poslove kao i muškarci“, istakla je Milijana Simić.

Predsjedavajući skupštinske Komisije za ravnopravnost spolova Senad Osmanović rekao je da bi Distrikt trebao više pažnje da posveti pitanjima ravnopravnosti spolova nego

do sada, o čemu, kaže, svjedoči broj žena poslanika u Skupštini kojih ima tri od trideset jednog poslanika.

„To je rezultat izbora koji se sprovode, ali i stranke treba više da se pozabave zastupljenošću žena u političkom životu“, poručio je Osmanović.

Službenica za rodna pitanja u Kancelariji šefa Misije OSCE-a u BiH Lejla Mamut rekla je da su žene podzastupljene u mnogim sferama života, posebno u politici. Mamut, koja se unutar Misije OSCE-a u BiH, bavi i učešćem žena u političkom životu u BiH, rekla je da je broj izabranih žena u svim zakonodavnim tijelima na svim nivoima vlasti u BiH i dalje ispod 30 posto.

Okruglom stolu prisustvovali su članovi komisija, zaposleni u Stručnoj službi Skupštine, predstavnici Policije, Vlade, Tužilaštva, Pravosudne komisije i Centra za mentalno zdravlje Brčko distrikta, te Institucije ombudsmana za ljudska prava, predstavnici civilnog sektora kao i Vijeća mladih i nacionalnih manjina Distrikta.



ODRŽANO PREDAVANJE O UNAPREĐENJU SIGURNOSTI DJECE I MLADIH NA INTERNETU



Stefan Marjanović inženjer elektrotehnike i administrator IT sistema u Skupštini Brčko distrikta održao je početkom novembra predavanje na Ekonomskom fakultetu za učenike završnih razreda srednjih škola i studente na temu: „Unapređenje sigurnosti djece i mladih na internetu“.

Cilj je bio skrenuti pažnju na sve veće zloupotrebe putem interneta, uticaj društvenih mreža na vršnjačko nasilje i sajberbuling (cyberbullying) te kako prepoznati signale, pristupiti i pružiti pomoć zlostavljenom djetetu i mladoj osobi.

Marjanović, čija je specijalnost kriptografija i internet zaštita, rekao je da je neophodno stvoriti kulturni obrazac ponašanja na internetu jer na internetu ne postoje pravila ponašanja što dovodi do zloupotreba s dalekosežnim posljedicama.

On je istakao da su sajber napadi na institucije u svijetu svakodnevna pojava, ali i isto tako i na pojedince, posebno mlade ljude.

„Ja bi kao primjer naveo mrežni napad koji se zove Men in d midl, a to praktično znači da maliciozni napadač može preusmjeriti internet saobraćaj s mobilnog uređaja korisnika kada se taj korisnik spoji

na neku internet mrežu, ukoliko se nije zaštitio“, pojasnio je Marjanović.

S toga, savjetuje Marjanović, neophodno je mlade ali i ostale korisnike interneta naučiti kako da se zaštite od zloupotreba modernih tehnologija te da to nije teško naučiti jer sve informacije o zaštiti korisnici mogu naći na YouTube kanalu.

Psiholog Nataša Jovanović, koja je bila predavač zajedno s Marjanovićem, rekla je da se nasilje iz realnog svijeta preselilo u virtuelni te da posljedice mogu biti emocionalne, socijalne, fizičke pa i sa smrtnim ishodom.

Intervju KATICA IVANOVIĆ

„SLUŠAJTE SVOJE
SRCE I SLIJEDITE
SVOJE STRASTI“



Katica Ivanović, Kaća kako je svi odmila zovemo, po struci je diplomirani ekonomista, i u Skupštini Brčko distrikta BiH obavlja poslove stručnog saradnika za skupštinske komisije. Izrada poziva, kompletiranje i dostavljanje materijala za sjednice komisija, tonsko snimanje sjednica komisije, izrada zapisnika i izvještaja sa sjednica komisija, samo su neki od zadataka iz opisa Katicinog posla.

Kaže ništa joj nije teško, jer u njenom radnom prostoru vlada pozitivna atmosfera. Inače, Katica kancelariju dijeli s kolegicom Amrom Halkić i napominje da su njih dvije odličan tim.

O svom radnom iskustvu u Skupštini Katica i Amra su govorile za Bilten te su, kažu, vrlo rado i iskreno odgovorile na postavljena pitanja.

*Razgovarala:
Maja Kovačević-Gudelj*

Katice, koliko dugo radite u Stručnoj službi Skupštine? Kako je bilo na početku, na kojim poslovima ste radile i je li bilo teže tada ili danas?

„U Stručnoj službi Skupštine radim 23 godine. Početak je uvijek stresan, pun izazova i težak, ali danas gledajući unatrag, primjećujem koliko sam napredovala. Jedan od izazova s kojim sam se tada susrela bio je veći broj javnih rasprava o budžetu Brčko distrikta BiH. Tada se održavalo između 18 i 20 javnih rasprava u mjesnim zajednicama, a zadnjih godina, taj broj se smanjio na samo tri javne rasprave. U to vrijeme poslanici su tražili da se rade stenogrami, odnosno da bukvalno sve pišemo od riječi do riječi ono što je rečeno na sjednicama. Ali, zahvaljujući razumijevanju poslanika, članova Komisije za budžet, šefa i kolega, uspjela sam se prilagoditi. Važno je napomenuti da su mi tada pomogle moje kolegice Vesna, Tidža i Amra, zbog čega sam im neizmjereno zahvalna.“

Zbog čega volite ovaj posao, šta je u njemu pozitivno, a šta negativno? Da li bi nešto promijenile?

„Moj posao u Skupštini je izvor zadovoljstva i prilika da pružim finansijsku podršku sebi i svo-

joj porodici. Radim u okruženju gdje su moje kolege postale kao porodica s kojom provodim znatno više vremena nego s mojim najbližima. Jedan od prijedloga koji podržavam je da se sastanci komisija ne održavaju srijedom prije sjednice Skupštine jer srijeda je već rezervisana za sjednicu Skupštine, što je dan kada su rasprave o važnim pitanjima u fokusu. Željela bih dodati još jedan važan prijedlog, a radi se o ograničenju trajanja sjednica komisija. Dugotrajne sjednice komisija, koje ponekad traju po nekoliko sati, mogu biti iscrpljujuće i neproduktivne.“

U vašoj kancelariji vlada opuštena i pozitivna atmosfera i svakoga pozdravite s osmjehom na licu i sigurna sam da svima uljepšate dan. Koliko dugo radite s kolegicom Amrom? Kakva je Amra kao kolegica i osoba? Opišite nam jedan vaš radni dan.

„Kancelariju dijelim s kolegicom Amrom Halkić punih osam (8) godina. Naša saradnja je zaista izvanredna i temelji se na poštovanju i međusobnoj podršci. Raditi s nekim ko dijeli istu strast i predanost prema poslu kao i Vi, zaista je blagoslov. Ono što posebno cijenim kod Amre je njena otvorenost za saradnju i dijeljenje ideja. Uvijek je spremna da sasluša i prihvati tuđe mišljenje, što je od izuzetne važnosti za uspješan timski rad. Uzajamno poštovanje i razumijevanje su ključni za stvaranje ugodnog radnog okruženja.

U kojoj mjeri vaši poslovi imaju dodira s građanima u smislu komunikacije sa njima?

„Moj posao se bazira na radu s poslanicima Skupštine Brčko distrikta BiH, ali također imam i direktan kontakt sa strankama, odnosno građanima koji upućuju zahtjeve komisijama Skupš-

tine. Moja uloga je da pružim podršku komisijama u njihovom radu i olakšam komunikaciju između njih i građana. To uključuje prikupljanje informacija, provjeru i obradu njihovih zahtjeva te pružanje odgovora na njihova pitanja. Također, pomažem u pripremi materijala za javne rasprave i radnih grupa koje se bave određenim pitanjima građana. Kroz svoj rad nastojim saslušati građane, razumjeti njihove probleme i pronaći rješenja koja su u skladu sa zakonom i politikama koje poslanici zastupaju.“

I na kraju našeg razgovora, Katice, šta bi poručili našim čitaocima, mladima, budućim i sadašnjim kolegama?

„Dragi čitatelji, mladi i kolege, Bez obzira na to u kojoj se fazi karijere nalazili ili koliko iskustva imali, smatram da je uvijek važno zadržati određene principe i stavove koji će pomoći da postignete uspjeh i ostanete sretni. Budite otvoreni za nove izazove i ne bojte se da izađete iz svoje zone komfora. Njeguajte dobre odnose sa svojim kolegama. Posao nije samo obavljanje zadataka, već i lijepa saradnja i timski rad. Ne zaboravite da je ravnoteža između posla i života ključna za vaše blagostanje. Rad je važan, ali ne smije biti sve što vas definiše. Vodite računa o svom fizičkom i mentalnom zdravlju. Pronađite vrijeme za hobije, porodicu i prijatelje. Ponekad je potrebno napraviti pauzu i odmoriti se kako biste se vratili osvježeni i motivisani. Slušajte svoje srce i slijedite svoje strasti!“



Intervju AMRA HALKIĆ



Amra Halkić je stručni saradnik za rad sa skupštinskim komisijama, a po zanimanju je diplomirani ekonomista. Kao i Katica, Amra je zadužena da prati rad nekoliko komisija iz različitih oblasti.

Amra radi u Skupštini Distrikta 22 godine i za to vrijeme kaže suočila se s brojnim izazovima, te je tako gledala na svaki radni zadatak.

Ponosno kaže da voli svoj posao te joj radni zadaci ne padaju teško.

„Ovaj posao mi je omogućio da se upoznam o funkcionisanju sistema jednog grada. Počela sam da radim nakon što je uspostavljena zakonodavna vlast u Brčko distriktu BiH. Kada poredim to vrijeme i ovo danas mnogo toga se promijenilo, mogu reći da smo napredovali u radu, jer tada su se mnogi poslovi obavljali ručno, kako mi

“TREBA
GRADITI DOBRE
MEĐULJUDSKE
ODNOSE!”

kažemo „pješke“. Sjećam se, naša organizacija na početku nije imala mnogo zaposlenih, danas već nije tako. Imamo sektore, formirane su i neke nove komisije, koje nisu bile na samo početku. U svakom slučaju, došlo je do napretka u obavljanju poslova i funkcionisanja radne organizacije.

Savjetuje da u obavljanju posla treba poštovati načela, da u poslu treba biti profesionalan, ali i fleksibilan, kolegijalan i lojalan, i da, prema kompetencijama, treba izvršavati i druge radne zadatke koji nisu stavljani u opis poslova svakog pojedinca.

„Što se više trudimo da naučimo rezultati neće izostati, a postat ćemo bolji radnici ali i ljudi. Uvijek treba tražiti mogućnosti za usavršavanje i dati mogućnost svima da iskažu svoje afinitete“, poručila je Amra.

Smatra da je veoma važno imati dobre međuljudske odnose koji su, kaže, osnova za funkcionisanje organizacije. Dodaje da ima dobru saradnju sa zaposlenima u službi, kao i članovima komisija, ali i građanima.

„Imala sam prilika, obavljajući radne zadatke, da komuniciram sa strankama. Pratila sam rad Komisije za upravu i finansije. U djelokrugu rada te komisije bila je



Od početka rada u Skupštini, Amra je kancelariju dijelila, prvo s kolegicom koja je otišla u penziju, a potom s Kaćom.

„Samim tim što provodimo dosta vremena zajedno u toku dana, bude tu, smijeha, radosnih i tužnih trenutaka, rasprava, svakako i razmjene mišljenja. Ponekad budemo u koliziji. Sve u svemu volim je, draga mi je, pozitivna je ličnost, osviještena kao normalno biće, bogato iskustvima, tako da, kada bi me pitali da li bi je mijenjala za bilo koju kolegicu u Skupštini, rekla bih NE!“

i dodjela finansijske pomoći, vjerskim zajednicama, neprofitnim organizacijama i fizičkim licima. U tome postupku, imala sam neposrednu komunikaciju s podnositeljima zahtjeva za dodjelu finan-

sijske pomoći. Naš posao je javan, tako da svaka osoba može da se informiše u vezi s postupkom realizacije nekog pitanja, koje je važno za određenu osobu.“, navela je Amra

„Trebamo se boriti da omogućimo što bolje uslove života. Ako je pojedincu dobro, treba da bude i ostatku svijeta, a ako svijet pati, čovjek ne treba da bude indiferentan. Volimo se“, poručila je Amra.



MEĐUNARODNI SUSRETI IZVIĐAČA PONOVRNO U BRČKOM



Predsjednik Skupštine Brčko distrikta Siniša Milić i gradonačelnik Zijad Nišić otvorili su Međunarodne susrete izviđača koji su održani u Brčkom od 20. do 22. oktobra 2023. godine.

Predsjednik Milić ovom prilikom je rekao da je i ovaj događaj pokazao da je Brčko otvoreni grad, da je mjesto okupljanja ne samo mladih već svih generacija te da podrška ovakvim događajima neće izostati od strane predstavnika vlasti ove lokalne zajednice.

Ivan Klašnić, načelnik Izviđača Brčko distrikta, rekao je da su Međunarodni susreti izviđača u



Brčkom organizovani nakon 32 godine od posljednjih susreta, te da su održani u organizaciji udruženja na čijem je čelu.


„Našim aktivnostima nastojimo da doprinesemo razvoju i unapređenju izviđaštva u Distriktu,

ali i šire. Sarađujemo s izviđačima iz cijelog svijeta kao i odgovarajućim društvenim, naučnim i stručnim organizacijama i organima, na realizaciji zadataka od obostranog interesa. Naš cilj je i zaštita i poštovanje prava i interesa članova Udruženja. Shodno tome, u proteklom periodu realizovali smo 17 projekata“, rekao je Klašnić.

Udruženje „Izviđači Brčko distrikta“ registrovano je 2012. godine i nosilac je izviđačkih aktivnosti Brčko distrikta BiH kao nasljednik organizacije izviđača započetih pedesetih godina prošlog vijeka. Suosnivači su Saveza izviđača u BiH kao krovne državne organizacije.

ODRŽANI 40. INTERNACIONALNI TEATARSKI SUSRETI

INTERNACIONALNI
TEATARSKI SUSRETI
BRČKO DISTRIKTA BiH



ИНТЕРНАЦИОНАЛНИ
ТЕАТАРСКИ СУСРЕТИ
БРЧКО ДИСТРИКТА БИХ

U drugoj polovini oktobra održani su 40. internacionalni teatarski susreti na kojima je Gran pri festivala osvojila predstava „Orestija“, Narodnog pozorišta Sarajevo i Internacionalnog teatarskog festivala MESS.

Predsjednik Skupštine Brčko distrikta BiH Siniša Milić, koji je festival proglasio otvorenim, rekao je da pozorište priča ljudske sudbine i da svako od nas treba da doprinese da naša svakodnevnica bude bolje.

Predsjednik Milić je istakao da je ovaj pozorišni festival jedinstven u regionu i da u budžetu Distrikta ima dovoljno prostora za njegovo finansiranje jer su benefiti koje ima višestruki.

U takmičarskom dijelu festivala predstavila su se pozorišta iz BiH, Srbije, Crne Gore i Hrvatske, dok je u čast pobjednika odigrana predstava „Goja“ beogradskog „Jugoarta“,

Pored takmičarskog, festival je obilježio i prateći dio programa u okviru kojeg su predstavljene dvije monografije: „Susreti na sceni jedinstva i različitosti“ i „Pola vijeka pozorišnih susreta“, antologija srpske drame i Susreta pozorišta u četiri knjige, časopis „Susreti“, te sedam dječijih predstava.

Selektor susreta bio je Goran Damjanac, dok su stručni žiri činili Vida Ognjenović, Vlado Kerošević i Zijah Sokolović.



GODINA TEATRALIJA
ГОДИНА ТЕАТРАЛИЈА

NAŠ GRAD BIO DOMAĆIN EVROPSKOG PRVENSTVA U KUGLANJU

Brčko je od 3. do 7. oktobra bilo domaćin "Euro Pokal-a", evropskog prvenstva u kuglanju u muškoj i ženskoj konkurenciji koje je svečano otvorio predsjednik Skupštine Brčko distrikta BiH Siniša Milić.

Predsjednik Milić ovom prilikom rekao je da bi Brčko moglo biti domaćin i svjetskog prvenstva u kuglanju 2026. godine.

„Ovo je lijepa slika koju mi želimo da pošaljemo iz Distrikta Brčko i ne samo danas nego tokom ci-

jele godine. Sigurno je da postoji prostora da se napravi napredak u smislu gradnje sportske infrastrukture. Kako je naš najveći resurs gostoprimstvo, siguran sam da će učesnici ponijeti lijepe utiske iz Brčkog“, rekao je Milić.

Titulu šampiona u muškoj konkurenciji ponijela je ekipa SKK "Raindorf" iz Njemačke. Drugo mjesto pripalo je ekipi TK "Zalaegerszegi" iz Mađarske, dok su bronzane medalje ponijeli članovi kluba "Podbrezova" iz Slovačke. "Mertojak" iz Splita našao se na čet-

vrtom mjestu, a sve ekipe nastavljaju takmičenje u Ligi šampiona.

Najbolje u ženskoj konkurenciji bile su kuglašice njemačkog „Poellwitz-a“, dok su se na drugom mjestu našle takmičarke austrijskog „Neunkirchen-a“. Bronzane medalje ponijele su članice kluba „Ferencvarosi“ iz Mađarske.

Na evropskom prvenstvu u kuglanju, koje je održano u organizaciji brčanskog Kuglaškog kluba "Rad" u Areni Bakarni", učestvovalo je 24 ekipa.







PREDSJEDNIK SKUPŠTINE PODIJELIO NOVOGODIŠNJE PAKETIĆE NAJMLAĐIM SUGRAĐANIMA

Predsjednik Skupštine Brčko distrikta BiH Siniša Milić, je povodom novogodišnjih praznika, podijelio novogodišnje paketiće djeci u jednom od šest objekata JU Dječje zabavište i obdanište „Naša djeca“, pacijentima u Mentalno-edukativno-rehabilitacionom centru i na Odjeljenju pedijatrije Opšte bolnice Brčko. Za djecu u ovim ustanovama Skupština Distrikta obezbijedila je oko šesto novogodišnjih paketića. Predsjednik Skupštine Siniša Milić rekao je da je ovo tradicija Skupštine, ističući da bi dječja radost morala biti inspiracija da se sa mnogo više energije uđe u novu

godinu i mladim naraštajima obezbijedi bolja budućnost.

„Oni koji rade direktno s djecom u predškolskom uzrastu su, možda, i najodgovorniji, jer djecu vaspitavaju da budu odgovorni pojedinci u društvu zbog čega ovoj profesiji treba dati daleko veći značaj. Znanje je samo jedan segment odrastanja. Danas je veoma važno kako će to znanje pojedinci da upotrijebe“, rekao je predsjednik Milić.

On je dodao da postoje različiti prijedlozi za unapređivanje predškolskog obrazovanja u Distriktu, te da se intenzivno radi na obezbjeđenju dodatnog prostora Predškolske ustanove „Naša dje-

ca“ kroz izgradnju još tri objekta u naseljima Srpska Varoš, Broduša i naselju Donji Brezik, jer nema dovoljno kapaciteta u postojećih šest objekata.

Predsjednik Milić je podsjetio da postoji inicijativa i za gradnju dnevnog centra za djecu s poteškoćama u razvoju te da su u budžetu bila izdvojena sredstva za njegovu gradnju.

„Da se ide u tom pravcu naročito su zainteresovana udruženja koja okupljaju djecu i mlade s poteškoćama u razvoju kao i roditelji te djece. Sigurno je da će u tom segmentu biti preduzeti odgovarajući koraci“, poručio je predsjednik Milić.





ČESTITKA PREDSJEDNIKA I POTPREDSJEDNIKA SKUPŠTINE POVODOM NOVE GODINE

„Svima sugrađanima želimo sretnu i uspješnu nastupajuću 2024. godinu.

Nadamo se da će godina u koju ulazimo donijeti više radosti, zdravlja i mira, ličnog ali i društvenog prosperiteta i ekonomskog razvoja kako u svijetu tako i u lokalnoj zajednici u kojoj živimo, što i jeste cilj kojem stremimo.

Ne zaboravimo da do tog cilja možemo stići jedino zajedničkim snagama, kompromisom, jer kompromis nema alternativu u savladavanju brojnih prepreka u donošenju razumnih, za društvo u cjelini korisnih rješenja

Sretna Nova godina!“

Predsjednik Skupštine
Siniša Milić

Potpredsjednik Skupštine
Ivo Filipović

SKUPŠTINA BRČKO DISTRIKTA BiH



Adresa: Mladena Maglova broj 2, Brčko



Telefoni: 049/215-516 (centrala)



E-mail: info@skupstinabd.ba



www.skupstinabd.ba



facebook.com/skupstinabrckodistriktabih



youtube.com/@skupstinabrckodistrikta/videos